

«Къушну ауанасын кёрсек къаяда,
Жолубуз болур, жарсытмаз Апсаты!» –
Деп айтылады эски уучу жырда,
Ол жырны тауда уучу этди, айтды.

Мараучула, уугъа чыгъып, жаныуар
Жолукъмай, кёпге айланганларында,
Айтхандыла: «Насып бизге жол табар,
Эсленир къуш ауанасы къаяда!»

Халкъым да, мен да кёп къыйынлыкъланы
Имбашларыбызда элтип баргъанда,
Айта турдукъ, кётюре палахланы:
«Къуш ауанасы кёрюнюр къаяда!»

1957